



欽定皇輿西域圖志

ル 5
104
14

十
冊



104
14



欽定皇輿西域圖志卷之二十目錄

山一

安西南路

南山

金山

獨登山

寬臺山

尖山

青山

欽定皇輿西域圖志 卷之二十 目錄

所錢支
有物那

懸泉山

三危山

鳴沙山

羊膊山

青墩峽

三隴山

龍勒山

紅山

安西北路

星星峽

塔勒納沁鄂拉

雅爾瑪罕鄂拉

必柳鄂拉

塔什達巴

庫舍圖達巴

阿勒札噶勒鄂拉

鄂什奇鄂拉

和洛圖達巴

烏可克達巴

托來達巴

察罕托羅海

哈套鄂拉

察罕哈瑪爾鄂拉

阿達爾干鄂拉

庫克托木達巴

必濟鄂拉

阿濟鄂拉

哈布塔克

欽定皇輿西域圖志卷之二十

山

臣等謹按西北地當艮位。扶輿磅礴。其勢實居天下之脊。語云。西北多山。有由來矣。禹益隨刊。世傳山經。於西北尤備。特其脈絡貫串支幹分合處。多畧而弗書。後世搜奇鑿險之流。目擊爲難。不免支離傳會。無以徵信來者。乃者

王師奏凱。開闢西陲。二萬餘里。亘祁連之長梁。阨極疑之雄塞。其間崇岡疊嶂。側嶺橫峯。參錯逶迤。

奇偉嶮列。不可名狀。總其要領。界以天山。北連
沙漠。有龍行迴顧之奇。南抱渾河。具鳥翼翕張
之勢。其餘條旁幹。並起伏蜿蜒。互標形勝。以至
鳥飛猿掛。棧度繩懸之境。靡不訝然。書然。軒豁
呈露。自昔三十六國之雄譚。詎誇聚米。亦越七
十二君之遠畧。難詡標銅已。且夫雪山葱嶺。作
鎮金方。史傳所垂。固已標名絕域。卽今昔稱名。
荒墟參錯。而譯音符契。什一猶存。如阿爾台之
爲金山。騰格里之爲天山。木素爾之爲雪山。悉

昭然可指。他若突厥建北庭於鏃曷山。在伊列
河西。當屬今伊犁河西之布哈山。山經載敦薨
山。敦薨水出焉。西注渤澤。渤澤卽蒲昌海。爲今
羅布淖爾。敦薨水爲海都河。則山當爲今之海
都山。均堪借證而得。況摹永和之碑。尋貞觀之
石。高巖剔蘚。境不盡於堯封。邃谷磨崖。疆未周
於戎索。以今荒磧不毛。伊古棄爲甌脫。皆得目
營手度。搜羅遺跡。使荆榛晦昧。咸耀於光明。重
以

聖天子奎文睿什。昭回西極。寧第狼居燕然之片石。所得擬夫煒煒煌煌者歟。志山第六

[Faded bleed-through text from the reverse side of the page]

欽定皇輿西域圖志卷之二十

山一

安西南路

南山。

南山在安西州南。跨越州境及敦煌。玉門二縣地。一名雪山。亦名祁連山。高峯疊巘。積雪春夏消釋。其發源有大河三。曰蘇賴。曰昌馬。曰黨河。支流競發。境內資以溉田。山自葱嶺分支。由葉爾羌和闐南逕安西州綿亘而東。統曰南山。由

是東接陝西。肅甘涼三州境。其東南一支。包青海。統黃河。東入陝西岷州界。經渭水之南。而東爲武功。太白。太乙諸山。又東北達於太華。卽一行所謂北戒。皆西域南山一脈所分。

漢書西域傳三十六國。南北有大山。其南山東出金城。與漢南山屬焉。自玉門陽關出西域。從鄯善傍南山北。波河西行至莎車爲南道。

隋書地理志福祿縣有祁連山。

元和志雪山在晉昌縣南百六十里。積雪至夏

不消。東南連吐谷渾界。

通志雪山在柳溝衛南三百里。東西綿亘不絕。今亦名南山。

按漢時所謂南北山。皆自葱嶺分支。其北山由疏勒尉頭溫宿龜茲焉耆車師六國東行。卽今喀什噶爾烏什阿克蘇庫車哈喇沙爾關展一帶北境之山。其南山由西夜莎車于闐扞彌戎盧精絕鄯善諸國東行。卽今由葉爾羌和闐之南入沙磧。歷安西州敦煌玉門

縣南境之山。漢書武帝紀。貳師將軍出酒泉。與右賢王戰於天山。師古曰。卽祁連山。匈奴謂天爲祁連。是漢時所謂天山者。卽指北山而言。若西域傳所云東出金城。與漢南山屬。又從鄯善傍山西行爲南道者。止稱南山。至隋書載福祿縣有祁連山。而晉書地理志載張祚以敦煌郡爲商州。張元靚以商州爲祁連郡。唐書福祿縣東南一百二十里有祁連戍。又以近南山而被名。於是南山亦號天山。

與漢時之北山爲天山者。同曰祁連而實分兩幹也。今西域回部諸國。皆在南山之北。卽漢書所謂南有大山也。東至涼。甘肅州。皆與此山爲一脈。卽漢書所謂與漢南山屬也。自安西州境外西南行。綿亘沙磧。直抵葱嶺。卽漢書所謂從鄯善傍南山北。波河西行至莎車爲南道者也。茲本漢時之舊。以北山爲天山。而於三十六國南境之山。止稱南山。庶幾稱名近古。而彼此不淆。若一統志旣稱南

山在安西衛南五十里。又稱雪山。在安西柳溝。二衛南者。以一山分支。各就所隸之境而言。實未嘗有兩山爾。

又按今安西州境。本淵泉縣地。初建沙州衛。後改府。淵泉爲附府首邑。今改直隸州。以敦煌。玉門二縣隸屬。故於疆域則首敘州。次敘縣。例也。惟是山川脈絡源流大者。跨越數境。必統其全局。尋端竟委。而後形勢昭然。古今符合。有未宜凌躡首尾。強與疆域相從者。茲

於安西山水。仍按大勢。近由嘉峪關西出。次第編敘。審賓主拱揖之形。辨分合注入之道。庶幾開帙瞭如。此志中類次諸部山川。與疆域分門之通例。爲特著於此。

金山

金山。在玉門縣北。靖逆城東九十里。環縣東西北三面。綿亘二百餘里。其西北境山峽曰赤金峽。赤金湖自縣南北流。逕峽中。其下流入阿拉克池。當山之南麓。

〔元和志〕金山在玉門縣東六十里出金。

〔寰宇記〕玉門縣長三百里石門周而山間。

按一統志載金山在赤金所東又稱赤斤山在赤金所西三十里似屬兩山今以形勢求之山在玉門縣北而亘乎東西蓋一山而異名者自赤金峽折而北東逕縣城與寰宇記所云玉門縣長三百里石門周而山間者相合是則縣名玉門衛名赤金皆取義於此。

獨登山。

獨登山在玉門縣北距城十里踰赤金湖而至。

又玉門縣南有紅山。

〔元和志〕獨登山在玉門縣北十里其山出鹽甘美有異常鹽取充貢獻。

按今玉門縣北之山即赤金峽之折而東北者舊名獨登當縣城直北應屬金山之支峯。

寬臺山。

寬臺山在玉門縣城東九十里惠回堡北山寬如臺故名。

一統志寬臺山在赤金所東南嘉峪關西。

按今嘉峪關迤西之山統名南山寬臺亦應其支峯也。又唐書玉門縣南有神兩山疑與寬臺山相近。

尖山。

尖山在安西州之東黃蘆岡西北九十里西南距州城四百五十里踰河而至其東為往哈密孔道。

青山。

青山在尖山西北一百六十里中經東長流水至此西南距縣城六百十里地當孔道。

懸泉山。

懸泉山在敦煌縣東一百三十里即南山之支峯山脈自縣境南來復繞為東屏山中水峽即懸泉也。

元和志懸泉山在沙州東北百三十里。

按沙州東北百三十里當屬漢廣至縣地。據後漢書注廣至故城在常樂東境又當為唐

之常樂。據此則漢書地理志稱廣至縣有昆侖障。唐書地理志稱常樂縣有拔河帝山。當與懸泉山方位相近也。

三危山。

三危山。在敦煌縣城東南四十里。亦南山之支峯。三峯聳峙。勢極危峻。故名。

山海經三危之山。三青鳥居之。是山也。廣員百

里。
水經注三危山。在敦煌縣南。

隋書地理志敦煌郡敦煌縣有三危山。

唐書地理志沙州敦煌郡敦煌縣東四十七里。有三危山。

括地志山在敦煌縣東南三十里。山有三峯。故曰三危。

按尚書舜典竄三苗于三危。禹貢雍州三危既宅。又導弱水至於三危。孔安國傳三危。西裔之山。此西域山名見於經者。厥名爲最古矣。更以山經以下諸書証之。卽今敦煌縣東

南四十里之山無疑也。唐一行敘北戒諸山。獨以三危爲首。是不知皆葱嶺南山所分。三危亦其支峯耳。魏書太平眞君六年。討吐谷渾。杜豐追被囊。度三危山。至雪山。生擒之。卽謂此山。又括地志。三危山。俗名卑羽山。寰宇記。俗名昇雨山。皆一山而隨時異名者。

鳴沙山。

鳴沙山。在敦煌縣東南十里。黨河經其西南。積沙所成。峯巒危峭。踰於石山。四面皆沙隴。背如

刀刃。人登之卽鳴。隨足墜落。經宿雨吹。輒復如舊。天氣晴朗。沙鳴聞於城內。其西卽禹貢所謂餘波入于流沙者也。山有泉曰沙井。挹注不竭。水極甘美。山麓有泉名月牙。其東爲千佛洞。有雷音寺。建寺之始。不詳年代。岩石間佛像萬計。寺有唐朝散大夫鄭王府諮議隴西李太賓碑。唐涼州司馬檢校國子祭酒兼御史中丞

缺姓氏

碑。各一。

水經注。敦煌縣南七里有鳴沙山。

隋書地理志。敦煌郡。敦煌縣。有神沙山。

元和志。鳴沙山。一名神沙山。

唐朝散大夫鄭王府諮議隴西李太賓碑文。五缺

十二飛閣。字缺二霞連衣。字缺一居。字缺一出入境聖

鬼佛。往往而在。字缺一以賊臣千。字缺九暴殄天物。

東自隴。字缺一舊陌走狐兔之羣。西盡陽關遺邑。

聚豺狼之窟。字缺一木夜警和門書局。塔中委塵。

禪處生。字缺一。時有信士朝散大夫鄭王府諮議

隴西李太賓。其先指樹命氏。紫氣度流沙之西。

刺山騰芳。字缺一名感懸泉之下。時高射虎。人望

登龍。開國西涼。稱藩東晉。諮議卽興聖皇帝十

三代孫。遠派天分。世濟其美。靈根地植。代不乏

賢。六代祖寶。隨使持節侍中西陲諸軍事。鎮西

大將軍領護西戎校尉。開府儀同三司。沙州牧

燉煌公。玉門。字缺一。封邑三千戶。曾祖達。皇燉煌

司馬。其後因家焉。祖搽。皇大黃府車騎將軍。考

奉國。皇昭武校尉。甘州和平鎮將。早逢昌運。得

展雄材。一命是凌雲之資。百齡懷捧日之慶。垂

篠

字從原刻

布穎。業繼弓裘。築室連閔。里成冠蓋。難

兄令弟。卓然履道之賢。翼子謀孫。宛爾保家之主。諮議天授。涓粹神假。正直交游。仰其信。鄉黨稱其仁。義泉深沉。酌而不竭。道氣虛遠。感而遂通。嘗以爲挹江海者難測。其淺深。望乾坤者不究其方圓。況色空皆空。性相無相。豈可以名言悟。豈可以文字知。夫然故方丈小室。默然入不二之妙。智度大道。法爾表無念之真。以其虛谷

騰聲。洪鐘應物。所以魔宮山坼。佛日天開。愛水朝清。昏衢夜曉。一音演法。四衆隨緣。直解髻珠。密傳心印。凡依有相。卽是所依。若任無爲。還成有任。由是巡山作禮。歷險經行。盤迴未周。軒檻字缺斷。刻削有地。締構無人。遂千金貿工。百堵興役。奮鎚聳壑。揭石聒山。素涅盤像一。鋪如意輪菩薩。不空罽索菩薩。各一。鋪畫報恩天請問普賢菩薩。文殊師利菩薩。東方藥師。西方淨土。千手千眼觀世音菩薩。彌勒上生下生如意輪

不空罽索等變各一。鋪賢切千佛一千軀。初坏
土塗。旋布錯彩。豁開石壁。儼現金容。本自不生。
示生於千界。今則無滅。示滅於雙林。考經尋源。
備物象設。梵王奔世。佛母下天。如意聖輪。圓轉
三有。不空妙索。維持四生。人其報恩。天則請問。
六牙象寶。搖紫佩以棲真。五色獸王。載青蓮而
捧聖。十二上願。列於淨刹。十六觀門。開其樂土。
大悲來儀于鷲嶺。慈字缺一降跡於龍華。不休哉。
千佛分身。聚成沙界。八部敷衆。重圍鐵山。希夷

無聲。悉宰欲動。爾其簷飛雁翅。砌盤龍鱗。雲霧
生於戶牖。雷霆走于階陛。左豁平陸。目極遠山。
前流長河。波映重閣。風鳴道樹。每韻苦空之聲。
露滴禪池。更澄清淨之趣。時節度觀察處置使
開府儀同三司御史大夫蔡國公周公。道洽生
知。才膺命世。清明內照。英華外敷。氣邁風雲。心
懸日月。文物居執憲之重。武威當杖鉞之雄。括
囊九流。住持十信。爰因蒐練之暇。以申禮敬之
誠。揭竿搽矛。闕戟以從。蓬頭駢脇。傍車而趨。熊

罷啟行。鵝鷺陪乘。字缺三蕩谷搖川。而至於斯
 窟也。層軒九空。複道一帶。前引簫唱。上干雲霓。
 雖以身容身。投跡無地。而舉足字缺一足。登天有
 堦。目窮二儀。心出三界。有若僧政沙門。釋靈悟
 法師。卽諮議之愛弟也。戒珠圓明。心境朗澈。學
 探萬偈。辯折千人。出火宅於字缺一乘。破空遣相。
 指化城于四座。虛往實歸。於是引兄大賓。弟大
 英。姪子良。子液。子望。子羽等。拜手于堦下。法師
 及姪僧志融。歛袂于堂上。曰。主人恤人求瘼。戡

難濟時。井稅且均。家財自給。是得旁開虛洞。橫
 敞危樓。將以翼大化。將以福先烈。休庇一郡。光
 昭六親。况祖孫五枝。圖素四刹。堂構免墜。詒厥
 無慚。非石何以表其貞。非文何以紀其遠。且登
 高能賦。古或無遺。遇物斯銘。今豈遐弃。紛然遞
 進。來以求蒙。蔡公乃指精廬。而謂愚曰。操斧伐
 柯。取則不遠。屬詞比事。固可當仁。仰恭指歸。俯
 就誠懇。敢字缺一其狂簡。庶髣於真宗。字缺三十
字缺一年龍集景辰。字缺五有十五日辛未建。字缺二

妹夫鄉貢明經攝燉煌州學博士陰庭誠。

唐涼州司馬檢校國子祭酒兼御史中丞缺碑

以上籍缺二乃缺八字缺八王缺二也缺一增

祖缺一司郎中賜緋魚袋缺三歸唐缺一右散

騎常侍英髦驥駟缺三皆以缺一古微言留心

儒素或登華第更高拔缺一之名文戰都堂每

中甲科之的雖云前陷居缺一而不墜弓裘暫

冠缺二猶次將軍之列予既承恩鳳闕父乃擢

處貂蟬朱門不愧于五侯樹戟崇隆于貴族至

於源分特秀門繼簪裾家承九錫之枝流派祥

雲之允時遭西陲汨沒至德年中十郡土崩彌

絕玉關之路凡三甲子運偶大中之初中興啟

途是金星耀芒之歲皇化溥洽通乎八宏遐占

雪山綿邈萬里府君春秋纔方弱冠文藝卓犖

進止規常迥然獨秀時則妻父河西隴右一十

一州節度管內觀察處置押蕃落營田支度等

使金紫光祿大夫特進食邑二千戶實封三百

戶賜紫金魚袋南陽張公諱義潮慕公之高望

藉公之文武。於是乃為秦晉。遂申伉儷之儀。將

奉承祧。世祚潘楊之美。公其時也。始蒙表薦。因

依獻捷。字從原刻親拜彤庭。宣宗臨軒。字缺二所以公

具家諫。面奏玉階。上亦冲融破顏。羣公愕視。乃

從別。字缺一勅授涼州司馬檢校國子祭酒兼御

史中丞。賜紫金魚袋。錫金銀寶具。詔命陪臣。乃

歸戎幕。字缺二餘載。河右麾戈。拔幟挾囊。龍韜盡

展。克復神鳥。而壹戎衣。殄勅寇於河蘭。馘獯戎

於澣。字從原刻海。加以隴頭霧卷。金河湜湜。瀨

之波。蒲海梟鯨。流沙弛列烽之患。復天寶之。字缺二

致唐堯之壽域晏如也。百城無拜井之虞。十

郡豐登。吏士賀來蘇之政。此乃三槐神异。百辟

稀功。英雄半千。名流萬古。公又累蒙朝獎。恩渥

日深。方佩隼旟。用堅磐石。勳猶未。字缺一俄已云

亡。享齡五十有二。終於燉煌之私第。亡叔僧妙

弁。在蕃以行高才峻。遐邇瞻依。名達戎王贊普。

追召特留在內。兼假臨壇供奉之號。字缺一以擅

持談柄。字缺一辯。字缺一流。恩洽燉煌。庇休家井。高

僧寶月。取以為儔。僧叡餘蹤。扇於河隴。亡妣汜氏太夫人龍字缺一鼎。鼎。盛族孤標。庭訓而保子謀孫。軌範而清資不乏。承家建業。薦累代而揚名。閱閱聯綿。長緒帝王之室。今乃逝矣。佳譽存焉。故府君贈右散騎常侍。生前遇三邊無警。四人有暇。於東臯命駕。傾誠謁先人之寶刹。迴顧粉壁。念疇昔之遺蹤。瞻禮玉豪。歎紅樓之半側。豈使林風透閨。埃塵寶座之前。峴嶺陽烏。曝露茶毗之所。嶺道之南。復有當家三窟。今亦重修。

泥金華石。篆籀存焉。於是乃募良工。訪其杞梓。質材運斧。百堵字缺一成。魯國班輪親臨勝境。雲霞大豁。寶砌崇墉。未及星環。斯構矗立。雕甍化出。巍巍不讓於龍宮。懸閣重軒。曉方字缺於日際。其功大矣。筆何宣哉。亡兄河西節度衙推兼監察御史明達。天與孤貞。松筠比節。懷文挾武。有張賓之策謀。破虜擒奸。每得玉堂之術。曾朝絳闕。敷奏金鸞。指畫山川。盡縱橫于天險。兄明德。任沙州錄事參軍。操持吏理。六曹無阿黨之

言深避四知。切慕乘鷗之詠。兄明詮。燉煌處士。

今古滿懷。灑落卿雲之彩。字缺先効靈光。騰喬

露之文。五柳字從原刻閑居。慕逍遙於庄字從原刻老夫

人南陽郡君張氏。卽河西萬戶侯太保張公第

十四之女。溫和雅暢。淑德令聞。深遵陶母之仁。

至切齊眉之操。先君歸覲。不得同赴于京華。外

族留連。各分飛于南北。於是兄亡弟喪。社稷傾

淪。假手托孤。幾辛勤于苟免。所賴大保神靈。辜

恩勦斃。重光嗣子。再整遺字缺雖手勦大功。而

心全弃置。見機取勝。不以爲懷。乃義立姪男秉

持旄鉞。總兵戎於舊府。樹勳績於新墀。內外肅

清。秋毫屏迹。慶豐山踴。呈瑞色于朱軒。陳霸動

容。歎字缺壯室。四方嚮義。信結隣羌。運籌不媿

於梓潼。貞烈字缺慙于世婦。間生神異。成太保

之徽猷。雖處閨門。實謂丈夫之女。然心悟道。併

弃樊籠。巡禮仙巖。彫字從原刻圖籙於字缺於時頓

捨青鳧字缺紫金于上國。解纓絡。弃珠珍。銷金

鈿于廊廡。運虛囊於庭際。乃得玉毫朗耀。光衝

有頂之峯。室相發輝。直抵大羅之所。長男使持節沙州諸軍事。字缺沙州刺史兼節度副使檢校右散騎常侍御史大夫。上柱國宏愿。輔唐憂國。政立祥風。忠孝頗懇於君親。禮讓靡忘於伯玉。六條布化。千里隨車。人歌來暮之。字缺龔黃之績。次男使持節瓜州刺史墨離軍押蕃落等使兼御史大夫宏定。文武全材。英雄賈勇。晉昌要險。能布頗牧之威。字缺野大荒。屏盪匈奴之迹。挾纊。字缺士卒。泯燧不媿于襄陽。都河自注

人知有道之君。積貯万。字從廂。東郡著彫金之好。次男使持節甘州刺史。字缺御史中丞上柱國宏諫。飛馳拔拒。惟慶忌而難儔。字缺楊。非由基而莫比。洎分符於張掖。故恤惇孤。布皇化于專城。懸魚發詠。次男朝議郎前守左神武軍。字缺兼侍御史宏益。三端俱備。六藝精通。工書有類。字缺札連芳於射戟。字缺達文雅而德重王音。於時豐年天稔。星使西臨。親抵燉煌。頒宣聖旨。內常侍。字缺玉裕稱克珣副倅師大夫稱齊

琪判

字 缺

大夫

字 缺

回偕

字 缺

樞密

杞材

遐耀

天威呈祥塞表。因鑿樂石。共紀太平。余所不

二 缺

字

然狂簡

字 缺

季歲次甲寅十月庚申朔五日

字

甲

一 缺

宋國

字 缺

西

字 缺

節度使兼司徒張

二 缺

字

妻弟前沙瓜伊

字 缺

撿校

字 缺

兼御史

十 缺

餘

字

州節度使兼御史大夫

缺

以下

五代高居誨使于闐記西至沙州南十里鳴沙山。

寰宇記鳴沙山一名沙角山。

按鳴沙神沙沙角一山而異名。而鳴沙之名

最古。後周併敦煌。鳴沙平康。效穀東鄉龍勒

六縣。為鳴沙縣。蓋亦因山而得名也。至山麓

雷音寺唐碑二。一為朝散大夫鄭王府諮議

隴西李太賓碑。高四尺五寸。闊二尺五寸。一

為涼州司馬撿校國子祭酒兼御史中丞

氏 姓

碑。高四尺二寸。闊二尺一寸。以李碑文義

考之。當時李太賓為鄭王府諮議時。捐金建

寺而立。其紀年之處。有十

缺

年龍集景辰字。

彷彿可辨。終唐之世。丙辰紀年者五。一為高宗顯慶元年。一為元宗開元四年。一為代宗大曆十一年。一為文宗開成元年。一為昭宗乾寧三年。則此碑之立。當屬大曆之十有一年也。其涼州司馬碑。姓氏無考。文惟稱其為張義潮女夫。義潮薦之於朝者。考義潮于大中五年。以瓜沙伊肅鄯甘河西蘭岷廓十一州來歸。即文內亦有大中之初。及宣宗臨軒之語。其為宣宗後碑無疑。碑末紀年雖缺。而

歲次甲寅十月庚申朔五日等字。則甚分明。以甲子推之。宜屬昭宗乾寧元年也。

羊膊山。

羊膊山。在敦煌縣南。多山石少樹木。

寰宇記。敦煌縣有羊膊山。又有王母樗蒲山。山有鹽池。在縣西南。

青敦峽。互見疆域。

青敦峽。在敦煌縣北一百九十里。踰南籍端水至其地。又迤西北行而於兩山之間。約百里許。

金定皇真西地圖志 卷二十一
曰博羅圖口。爲往哈密西道。

三隴山。

三隴山。在鳴沙山西南八十里。黨河西。東距敦煌縣城一百二十里。形如山字。巨石中斷。形勢自鳴沙山西走。迤邐八十里至黨河而斷。河西三峯卓立。肅州新志所謂玉門關外有三斷山。石極大。世謂之三隴山是也。由是而西。沙多土少。又四十里。過巴顏布拉克。一望皆沙磧矣。山北有五峯。其一名苜蓿峯。東距敦煌縣城一百

五十里。

按唐岑參苜蓿峯寄家人詩云。苜蓿峯前逢立春。註云。玉門關外有五峯。苜蓿峯其一也。龍勒山。

龍勒山。在敦煌縣西南三百里。其下卽爲龍勒水。漢龍勒縣。因山以名。

舊唐書地理志。壽昌。漢龍勒縣地。縣南有龍勒山。

括地志。龍勒山。在壽昌縣南一百六十五里。

按龍勒山應與龍勒故城相近者。今黨河西境高原之上。城基三四號古營盤。或即當時城郭遺墟。其左右山形環帶。所謂龍勒山也。

紅山。

紅山。在敦煌縣西。東距縣城一百二十里。黨河之西。地名紅山口。東十里有石鄂博。其西為古

陽關。

說見卷八疆域

以上屬安西州。

安西北路。

星星峽。

互見疆域

星星峽。在哈密東南四百九十五里。南距安西州屬之馬蓮井七十里。迤邐東北行四百十五里。為西黃蘆岡。峽在沙磧中。接安西州界。

塔勒納沁鄂拉。

塔勒納沁鄂拉。

鄂拉山也。蒙古語謂後倣此。

在塔勒納沁南。

星星峽北二百五十里。西南距哈密城四百五十里。塔勒納沁郭勒分出於其南北麓。為二源。其北四十里有雪蓮坪。相傳雪蓮產此者佳。山

脈自葱嶺分支。迤東而來。三千餘里。至此為天山東盡處。

按塔勒納沁鄂拉。天山東境。於茲而盡。由是歷嶂西行。入鎮西府。庫勒。巴爾。界峻嶺層沓。亦屬天山之尾閭。茲以哈密及鎮西府界內峯巒皆舊疆域所隸。故先舉之。

又按宋王延德高昌行記。載自夏州歷樓于山。都督山。唐回鶻之地。又經馬駿山。望鄉嶺。嶺上石龕有李陵題字處。然後歷伊州。伊州

為今哈密。則樓于。都督諸山。當在今哈密東南境上。惟是史傳所紀。其未載明方位。及無道里可稽者。必一一指其山以實之。則失之鑿矣。為附見于此。

以上屬哈密。

雅爾瑪罕鄂拉。

雅爾瑪罕鄂拉。在塔勒納沁鄂拉西一百五十里。圖古里克之南。西北距鎮西府城三百里。山脈自庫舍圖達巴東行二百里至此。峯巒峻拔。

必柳鄂拉。

必柳鄂拉。在雅爾瑪罕鄂拉西南一百里。必柳布拉克出其南麓。

塔什達巴。

塔什達巴。

達巴。蒙古語。謂嶺也。後倣此。

在必柳鄂拉西北三

十里。呼濟爾台之東南。鞭桿河出其南麓。

按蒙古謂山為鄂拉。回語謂山為塔克。嶺則同謂之達巴。志中凡以漢語名者皆仍其舊。如南山、沙山、金嶺、葱嶺之屬。其以蒙古語及

回語名者各以類從。如塔勒納泌鄂拉、塔什達巴、哈布塔克之屬。庶稱名較順。不相淆雜云。

庫舍圖達巴。

庫舍圖達巴。在塔什達巴西。奎蘇東南六十里。西北距鎮西府城一百五十里。山脈自烏可克達巴東行三百里至此。即巴爾庫勒南山。山徑稍夷。為南北通行之道。俗名東打坂。打坂即達巴之轉音。蓋言嶺也。與西打坂東西相望。度嶺

北行十里。為招摩多。漢語名。松樹塘。自哈密東北行五

十里為南山口。即山南入嶺處。上有唐左屯衛

將軍姜行本碑。雍正十一年間。將軍查郎阿開

南山運道。經數十折。達於山頂。

唐左屯衛將軍姜行本勒石字缺二文昔匈奴未

滅。寶將軍勒燕然之功。閩越未清。馬伏波樹銅

柱之蹟。然則振英風於絕域。申壯績於殊方。缺

騰缺於千秋。播芳猷于萬古者矣。大唐德合二

儀。道高五帝。握金鏡以朝萬國。調玉燭以馭兆

民。濟濟衣冠。煌煌禮樂。車書盛軌。扶桑之表皆

同。治化所沾。濛汜之鄉咸暨。苑天山而池瀚海。

開北戶以靜幽都。莫不解缺於菁街缺改缺於

夷邸。高昌國者。漢屯田之舊壁。遺兵之所居。麴

文泰即其會豪也。往因晉室多難。羣雄競馳。中

原乏主。邊障遂隔。間居缺玉厯缺自王威遠被。

稽顙來庭。雖沐仁風。情懷首鼠。杜遠方之職貢。

阻重譯之缺肆豺狼之心。起蜂蠆之毒。發徒聚

眾兵。缺政無已。聖人愍彼蒼生。申茲弔伐。乃詔

使持節光祿大夫吏部尙書陳國公侯君集交
河道行軍大總管左屯衛大將軍上柱國永安
郡開國公薛萬鈞副總管左屯衛將軍上柱國
通川縣開國男姜行本等爰整三軍張行天討
但妖氛未殄將軍逞七縱之威百難作圍英奇
申九政之畧以通川公深謀間出妙思縱橫命
前軍營造攻具乃統沙州刺史上柱國望都縣
開國侯劉德敏右監門中郎將上柱國淮安縣
開國公衡智錫左屯衛中郎將上柱國富陽縣

開國伯屈昉左武侯郎將李海岸前開州刺史
時德衡右監門府長王進威等並率驍雄鼓行
而進以貞觀十四年五月十日師次伊吾折羅
漫山登里缺所未盈旬月克成奇功伐木則山
林殫盡叱咤則山谷蕩薄衝梯缺百櫓冰缺
機櫓一發千石雲飛墨翟之術無施公輸之妙
詎比大總管運籌帷幄繼以中軍鐵騎亘原野
金鼓動天地高旌蔽日月長戟缺雲自秦漢
出師以來未有如斯之盛也班定遠之通西域

故迹罕存。鄭都護之滅車師。空聞前史。雄圖世著。彼獨何人。乃勒石紀功。傳諸不朽。其詞曰。於赫大唐。受天明命。化齊得所。功無與競。荒服猶阻。夷君不定。乃拜將軍。殄茲梟獍。其一六奇動思。羣雄逞力。陣門龍營。其二麗星日光。旗明白色。揚旌塞表。振威西極。其三峩峩峻嶺。渺渺平原。塞雲冥結。邊風晝昏。長征高樹。其四銘功讚德。其五

缺大唐貞觀十四年歲次庚子六月丁卯朔二十五日辛卯。瓜州司法參軍河內司馬

缺下

唐書姜行本傳。高昌之役。為行軍副總管。出伊州。距柳谷百里。依山造攻械。增損舊法。械益精。其處有漢班超紀功碑。行本磨去古刻。更刊頌陳國威靈。遂與侯君集進平高昌。

按庫舍圖達巴。譯言碑嶺。姜碑現存。是嶺以碑名無疑也。舊一統志謂即侯君集平高昌後紀功碑。傲竇憲勒銘燕然意。不在高昌國都。然考唐書太宗紀。貞觀十三年十二月壬申。侯君集為交河道行軍大總管。伐高昌。十

四年八月癸酉克高昌。侯君集傳高昌平。君集刻石紀功還。據此則君集刻石紀功當在八月癸酉克高昌後。今碑嶺之碑。石刻六月辛卯。可知其非一碑。且文中但著出師之盛。未陳凱捷之功。更以姜行本傳磨班碑更刊頌之文証之。所謂依山造械者。正與碑文伐木殫林。公輸比妙諸語相合。則此碑之建。應在伊州造械時。進平高昌以前。是侯君集平高昌紀功。當別有刻石。未可云卽屬此碑。而

東當時紀功之碑。亦未必不立於高昌國都也。
阿勒扎噶勒鄂拉。

阿勒扎噶勒鄂拉。在庫舍圖達巴西北。東南距鎮西府城八十里。山脈自西五十里之和洛圖達巴。東北行綿亘百餘里。與鎮西府北境哈套察罕哈瑪爾。阿達爾干諸山相接。爲天山之分支。

鄂什奇鄂拉。

鄂什奇鄂拉。一名獨子山。卽阿勒扎噶勒鄂拉

支峯在巴爾庫勒淖爾南十五里。

和洛圖達巴。

和洛圖達巴在阿勒扎噶勒鄂拉西五十里。蒐濟西南當孔道。東北距鎮西府城一百里。山脈自西五十里之烏可克達巴東行至此。稍折而北。

烏可克達巴。

烏可克達巴在和洛圖達巴西五十里。當孔道。東北距鎮西府城一百五十里。山脈自西三十

五里之托來達巴東行至此。山徑稍夷。可通南。北。俗名西打坂。

托來達巴。

托來達巴在烏可克達巴西三十五里。托來布拉克出其西麓。東北距鎮西府城一百九十五里。山脈自西七百餘里之博克達鄂拉。分支東北行至此。當鎮西府東南境。

察罕托羅海。

察罕托羅海。猶云白峯也。在托來達巴西。

欽定皇朝西域圖志 卷二十一 三
哈套鄂拉。

哈套鄂拉。在阿勒扎噶勒鄂拉西。西里克拜牲城東北。東南距鎮西府城一百八十里。山脈自西來。南接托來達巴。東行爲鎮西府境北屏。

察罕哈瑪爾鄂拉。

察罕哈瑪爾鄂拉。在哈套鄂拉東。巴爾庫勒淖爾之北。南距鎮西府城四十里。

阿達爾干鄂拉。

阿達爾干鄂拉。在察罕哈瑪爾鄂拉東一百六

崇覽覆校

十里。舊木城之北。阿拉克椿濟郭勒流其東。西南距鎮西府城二百里。

庫克托木達巴。

庫克托木達巴。在阿達爾干鄂拉東。哈喇和屯之西北。山脈自哈套鄂拉東行爲察罕哈瑪爾鄂拉。又東爲阿達爾干鄂拉。至此又東北行五百餘里。踰鎮西府界。入於沙磧。

漢書武帝紀。天漢二年。貳師將軍出酒泉。與右賢王戰于天山。注。晉灼曰。在西域。近蒲類國。去

長安八千餘里。師古曰。卽祁連山也。匈奴謂天爲祁連。今鮮卑語尙然。

後漢書明帝記。永平十六年。遣奉車都尉竇固出酒泉伐北匈奴。破呼衍王于天山。十七年。遣奉車都尉竇固。駙馬都尉耿秉。騎都尉劉張。出敦煌昆侖塞。擊破白山虜於蒲類海山。遂入車師。注。河西舊事曰。白山。冬夏有雪。故曰白山。匈奴謂之天山。過之皆下馬拜。去蒲類海百里之內。

魏書高車傳。彌俄突與蠕蠕主伏圖戰。爲伏圖所敗。西走三百餘里。伏圖次於伊吾北山。唐書地理志。伊州伊吾縣。有折羅漫山。亦曰天山。

按漢貳師將軍與右賢王戰于天山。出酒泉而近蒲類國。今之鎮西府。卽舊巴爾庫勒。爲匈奴東蒲類王茲力支地。則此天山。應在鎮西府境也。漢敦煌太守裴岑。誅呼衍王。其碑刻現存。竇固破呼衍王于天山。在唐伊州北。

擊破白山虜。遂入車師。在蒲類海百里之內。唐伊州爲今哈密。及鎮西府。漢車師爲今闐展。是寶固破虜之處。當在伊州之南。車師之西。所謂天山白山者。自今托來達巴。至塔勒納沁鄂拉。東西綿亘之山皆是。哈密及鎮西府。漢爲伊吾盧地。於魏入蠕蠕。則魏書所謂伊吾北山。卽指伊吾盧北境之山可知。唐書稱折羅漫山。亦曰白山。蓋一天山而古今異名者。云在伊吾柔遠北。則亦不外哈密及鎮

西府境內矣。

又按舊一統志於哈密境內。載有但密山。據元和志山北二十里。正抵蒲類海之文。謂但密山在哈密東北。而以元和志所稱繞海多良田。漢將趙充國屯者爲無據。今考充國傳。前征匈奴。後征先零羌。屯田係征羌時事。先零羌居西域之南。充國屯田。以隔絕羌胡。在北祁連山之南。決無北踰天山。而屯於蒲類之理。又元和志稱但密山在納職縣北一百

四十里。唐書納職縣以鄯善故城置。在玉門關西。則元和志所云蒲類海者。當卽蒲昌海。境與南羌相近。充國所屯。宜在于此。而但密山之不在哈密境內可知也。

必濟鄂拉。

必濟鄂拉。在庫克托木達巴北一百二十里。地當孔道南。東北踰山。至華烏里雅蘇台。折而西北行二百餘里。爲古爾畢達巴。入天山北路界。阿濟鄂拉。

阿濟鄂拉。在必濟鄂拉東北一百里。當孔道南。通哈喇和屯一百里。

哈布塔克。

互見疆域。

哈布塔克。

塔克。回語。謂山也。後做此。

在必濟鄂拉西北。四圍皆沙磧。東南距鎮西府城四百里。自此西北行。與天山北路之拜塔克相接。爲準噶爾舊疆交界處。山北六十里。卽布拉干郭勒。以上屬鎮西府。

欽定皇輿西域圖志卷二十一

東北一百里當其南

欽定皇輿西域圖志卷之二十一目錄

山二

天山正幹

天山

額得墨克達巴

博克達鄂拉

托克喇鄂拉

阿拉癸鄂拉

哲爾格斯鄂拉

烏可克達巴

孟克圖達巴

哈屯博克達鄂拉

古爾班多博克鄂拉

額林哈畢爾噶鄂拉

庫舍圖達巴

們都招達巴

鄂蘭達巴

額勒伯克鄂拉

二十一目錄

額布圖達巴

烏得音郭勒達巴

納喇特達巴

汗騰格里鄂拉

額什克巴什鄂拉

阿勒坦呼蘇鄂拉

木素爾鄂拉

薩瓦布齊鄂拉

卓哈達巴

伯得里克鄂拉

烏成庫什達巴

喀克沙勒鄂拉

額圖克達巴

哈喇鄂拉

欽定皇輿西域圖志卷之二十一

山二

天山正幹。

天山

天山一名祁連。一名雪山。一名白山。又名折羅漫山。其山遠自葱嶺分支。自喀什噶爾之北。迤東而行。經烏什。阿克蘇。庫車。哈喇沙爾。闢展之北。又東行入鎮西府界。至塔勒納沁而止。皆曰天山。東西綿亘三千餘里。層峯疊嶂。隨地異名。

蓋以百數。其最著者。自葱嶺分支。東六百里為
 喀克沙勒鄂拉。又東六百里為薩瓦布齊鄂拉。
 又東三百里為木素爾鄂拉。木素爾之為言雪
 也。即古所謂雪山者也。又東四百里為汗騰格
 里鄂拉。騰格里之為言天也。即古所謂天山者
 也。又東五百里為納喇特達巴。又東北三百里
 為額布圖達巴。又東三百里為哈屯博克達鄂
 拉。又東南五百里為阿拉癸鄂拉。又北二百里
 為博克達鄂拉。又東六百里入鎮西府境。

詳見卷二

十。山南大河橫亘。分支絕少。山北自額布圖達
 巴分支西北行。至庫隴奎格登諸鄂拉。自鎮西
 府境分支東北行。又折而西北至阿勒坦鄂拉。
 即古金山。皆自天山分脈。有龍象回顧之勢。於
 北天山全體形勢。益增雄壯。

山海經三危山西三百五十里曰天山。

漢書西域傳西域南北有大山。東西六千餘里。
 自車師前王庭。隨北山波河西行至疏勒為北
 道。

通典自張掖而西。至于庭州。相去三千五百六十里。而山皆周徧。

唐書薛仁貴傳。詔副鄭仁泰爲鐵勒道行軍總管。時九姓衆十餘萬。令驍騎數十來挑戰。仁貴發三矢。輒殺三人。于是虜氣懾。皆降。軍中歌曰。將軍三箭定天山。壯士長調入漢關。九姓遂衰。鐵勒有思結多覽葛等部。先保天山。及仁泰至。懼而降。地理志折羅漫山。亦曰天山。

宋史外國傳高昌。西距西天步。路涉雪山葱嶺。

皆數千里。回鶻本國。東至黃河。西至雪山。

按天山東西三千餘里。實止一山。而巒嶺殊形。稱名互異。卽西域傳所謂北山也。通典自張掖至庭州者。僅指迪化州迤東之山而言。迪化州治。卽烏魯木齊。固卽唐庭州地也。舊一統志稱天山。一名白山。自哈密東北境綿亘而西。經關展境。又西入準噶爾界。殆三千餘里。又西南與葱嶺接。其間土名不一。當時西境半屬夷疆。故第舉天山全局之通稱。其

自關展以西。或未及周知悉考。今尺山寸石。均入

皇輿。東西三千餘里。不難按地周稽。而南居回部。北宅準夷。保界荒陬。形勢居最。今舉大凡于此。至其峯嶺之隨地異名者。仍自鎮西府西出。逐條分載焉。

額得墨克達巴。

額得墨克達巴。在托來達巴西七百餘里。關展北。為博克達迤東之支山。察罕烏蘇。納里特布

拉克。發源於其北麓。

〔山海經〕天山西二百九十里曰泐山。西行百里。至於翼望之山。郭璞注。翼望。或作土翠山。

按山海經載天山。注云。即漢貳師擊右賢王處。當指今哈密及鎮西府境內北山而言。由是西行四百里內泐山。翼望山。以今道里計之。應在今鎮西府以西。額得墨克達巴以東。天山正幹之內也。

博克達鄂拉。

博克達鄂拉。在額得墨克達巴西。天山最高峯也。東南距闢展二百里。高八里。山脈自烏魯木齊東南之托克喇鄂拉。折而東北行一百六十里。高峯突起。爲迪化州境東北一大屏障。托克三郭勒。發源南麓。多倫庫里葉圖諸布拉克。發源北麓。乾隆二十年。討準噶爾。二十二年。追討阿睦爾撒納。大兵道出其麓。二十五年。西域平。軍旅凱旋。咸祭告。自是秩于祀典。每歲春日致祭。

告祭博克達鄂拉文。

朕恭承

鴻業。撫馭寰區。康乂柔懷。中外一視。準噶爾部落。向遠王化。篡弑相仍。因而內亂。達瓦齊又復殘虐其屬。分崩離析。人不聊生。雖在殊荒。均之赤子。朕何忍不爲拯救。坐視帖危。爰整王師。分道並進。今西路大兵。道出神境。惟神建標西域。聳峙萬山。形勢削成。光靈燁赫。尙其默相。翼我明威。期迅奏乎膚功。永救寧夫遠服。虔申昭告。用布馨香。惟神鑒焉。乾隆二十年月日。

朕繼承

祖緒。中外一家。撫順討逆。式昭柔遠之模。布德宣威。丕振詰戎之畧。茲以西陲小醜。負恩作叛。煽惑邊疆。實自外于生成。斷難寬夫勦戮。爰命定邊將軍喀爾喀扎薩克和碩親王成滾扎布。整師鞠旅。盡掃餘氛。大軍道出神境。惟神建標西域。聳峙萬山。形勢削成。光靈燁赫。尙其明昭翊應。默佑膚功。期計日以執俘。聿彰武績。用寧邊而敷化。誕擴鴻圖。敬薦馨香。惟神鑒格。乾隆二十二年月日

朕繼緒丕基。輯寧函夏。遐方効順。諸部歸心。乃逆回霍集占。波羅泥都者。自我師定有伊犁。拔諸囚繫。旣負孤恩之惡。尤干黨逆之誅。朕命將移兵。奉辭伐罪。頻摧衆醜。六師皆破竹而前。屢克堅城。萬里如建瓴而下。逃聽者嚮風。納降者恐後。遂械貳負之尸。獻防風之骨。弟兄駢首。申國憲于藁街。遠近傾心。撫皇輿於絕漠。繼

兩朝而葳事。未五載而告功。仰賴洪庥。實資默贊。曩者大軍變伐。宣威曾告山靈。今茲重譯歸懷。將禮用酬。

神貺。右享還齊於嶽瀆。西陲永奠于遐荒。薦我馨香。尙其歆格。乾隆二十五年月日。

歲祭博克達鄂拉文

惟神作鎮西陲。効靈中土。出雲降雨。陰陽胖蠶之功。切漢憑霄。龍虎縈回之勢。邁祁連而聳秀。嘉名並王會圖中。指懸圃以建標。顯位在大荒經外。式昭有赫。永奠無疆。朕繼序重熙。救寧六合。日月照臨之地。盡入版圖。乾坤覆載之區。悉歸亭育。萬類登諸仁壽。百神攝以懷柔。惟茲烏魯木齊。實當勝地。巴爾哈達。舊

崇寬覆校

接神皋。山靈之保障斯存。境內之屏藩攸寄。幅員計里。不殊左右戶庭。屯牧如雲。遙接東西侯尉。是宜登之祀典。載在禮官。爰卜日於春初。俾定期以時享。升香瘞玉。適均列嶽之班。宣氣調神。常峙塞垣之域。式扶鼇紀。丕鞏鴻圖。用薦苾芬。惟祈歆格。

魏書高昌傳。北七十里。有貪汗山。夏有積雪。此山北鐵勒界也。

隋書鐵勒傳。大業元年。突厥處羅可汗。擊鐵勒。諸部遂叛。拒處羅。立俟利發。俟斤契弊。謁楞爲

易勿真莫何可汗居貪汗山莫何勇毅絕倫伊吾高昌焉者諸國悉附之

唐書突厥傳咄陸入寇伊州安西都護郭孝恪敗之咄陸以處月處蜜兵圍天山而不克回鶻傳西突厥處羅可汗之殺鐵勒諸酋也其下往往相率叛去推契苾哥楞爲可汗據貪汗山

按博克達鄂拉在鎮西府西闢展北鎮西府古伊州闢展古高昌則博克達鄂拉當卽高昌北七十里之貪汗山咄陸可汗自伊州敗

還而圍天山宜在此地也北史魏書唐書俱作貪汗山惟隋書作貪汗疑傳寫之訛

托克喇鄂拉

托克喇鄂拉在博克達鄂拉西南一百六十里迪化州東南五十里山脈自哲爾格斯鄂拉東行至此停蓄折而北卽今迪化州東障也

按漢書西域傳載蒲類國治天山西疏榆谷天山大形勢東西綿亘而曰在天山西者自今哲爾格斯鄂拉折而北由托克喇鄂拉至

博克達鄂拉。二百里間。南北綿亘。蒲類國固當倚其西麓。則所謂疏榆谷者。應在今托克喇鄂拉左右山谷之間。其於方位爲適相合也。

阿拉癸鄂拉。

阿拉癸鄂拉。在托克喇鄂拉西南二十里。迪化州南。入東谷口西行一百三十里。山深林密。人馬登陟崖坎。六十餘里。徑轉險窄。駝馬難行。又七十里仍在谷內。倚山一角。有土城。城內鑿山

如梯狀。爲展關。西至裕勒都斯關隘。

哲爾格斯鄂拉。

哲爾格斯鄂拉。在阿拉癸鄂拉西北三十里。迪化州南。古爾班哲爾格郭勒出其西。山脈自孟克圖達巴。東北行四十里。爲烏可克達巴。又東行三十里至此。

烏可克達巴。

烏可克達巴。在哲爾格斯鄂拉西三十里。爲迪化州西南屏。阿勒塔齊郭勒。發源北麓。

唐書突厥傳賀魯寇廷州。詔左武衛大將軍梁建方等擊之。處月朱邪孤注者引兵附賊。據牢山。建方等攻之。衆潰。追行五百里。斬孤注上首九千級。虜其帥六十。永徽四年。卽處月置金滿州。

按唐北庭都護府本廷州。

地理志作庭州

以賀魯等

部落置統縣四。金滿。輪臺。後庭。西海。卽以賀魯爲瑤池都督。處于廷州。後賀魯犯西廷二州。駱宏義請寬處月處蜜諸部。專誅賀魯。而

處月朱邪孤注。遂附賀魯。據牢山及梁建方攻克後。罷瑤池都督。卽處月部置金滿洲隸北庭。與廷州屬縣名同。知其境地毗接。今迪化州爲唐北廷所屬之後庭。金滿縣。則當時處月附賀魯而據牢山。應屬今迪化州南境東之山。托克喇。阿拉癸。哲爾格斯。烏可克諸鄂十拉達巴。蓋必居一于此也。

孟克圖達巴。

孟克圖達巴在烏可克達巴西南四十里。昌吉

縣治南。昌吉羅克倫兩郭勒發源北麓。山脈自西北三百里之哈屯博克達鄂拉。東行二百三十餘里。逾登努勒台境。折而東南五十餘里。又東行約百餘里至此。岡巒特峻。

哈屯博克達鄂拉。

哈屯博克達鄂拉。在孟克圖達巴西北三百里。綏來縣南。哈布齊亥北。哈齊克瑪納斯兩郭勒。發源北麓。多木達都哈布齊亥郭勒。出其南山。脈自額林哈畢爾噶鄂拉。東南行六十里。爲古

爾班多博克鄂拉。又東四十里至此。其高不及迪化州東境之博克達鄂拉。而勢亦聳峻。天山次高峯也。

唐書突厥傳。咄陸以處月處蜜兵圍天山而不克。郭孝恪拔處月俟斤之城。抵遏索山降處蜜部而還。

按唐處月部爲金滿州。在北廷。今爲迪化州以東。博克達鄂拉以北之地。處蜜部居處月西。在今瑪納斯郭勒左右。當哈屯博克達鄂

拉之北。咄陸以處月處蜜兵。進圍天山者。迪化州東境之博克達鄂拉也。孝恪追北之會。先拔處月城。後抵遏索山。是遏索山必在處月之西。爲今之哈屯博克達鄂拉。而處蜜居山之北。兵至其境。故降也。

古爾班多博克鄂拉。

古爾班多博克鄂拉。在哈屯博克達鄂拉西四十里。瑪納斯南。哈布齊垓北。烏蘭烏蘇發源北麓。

額林哈畢爾噶鄂拉。

額林哈畢爾噶鄂拉。舊音額林哈畢爾罕。在古爾班多博克鄂拉西北六十里。和爾郭斯安濟哈雅兩郭勒發源北麓。巴倫哈布齊垓郭勒出其南。山脈自額布圖達巴東行二百二十里。踰安濟哈雅至此。乾隆二十二年。討阿睦爾撒納遣官祭告。二十四年。西域平。秩於祀典。每歲春秋致祭。

告祭額林哈畢爾噶鄂拉文。

欽定皇朝西域圖志 卷二十一
三
朕寅紹丕基。輯寧函夏。荷百靈之效順。美報必伸。當
萬里之奏功。明禋咸秩。惟神遐荒。迥峙靈應。夙昭高
埒。天山遠通。月融屬當。逆賊阿睦爾撒納。負恩狡叛。
竄迹僑棲。收拾殘黎。誘招諸部。復鷓張而起事。旋蠶
食以逞謀。游牧至斯。披猖寢甚。鄰近皆潛爲烏合。逆
會漸欲肆螳當。已而王旅驟加。賊軍輒駭。四山草木。
盡助聲威。諸嶺風雲。俱增叱咤。奔鹿遂不遑擇蔭。窮
魚乃自絕游魂。雖追躡連逃。又閱時而竣事。而摧拉
枯朽。實從此以振威。信乎奉天討以出師。明神咸祐。

茲者葳武功而底績。秩祀宜申。用昭右序之文。遣祠
官而致享。永作西陲之鎮。鞏邊圉以救寧。乾隆二十
二年月日。

歲祭額林哈畢爾噶鄂拉文。

惟神保障遐方。奠基西土。層巒內拱。在漠南綏靖之
前。協氣遙迎。當闔外奮揚之日。逐飛廉于塞外。八公
之草木皆兵。示象鼎于寰中。九牧之神姦悉化。輯寧
有地。報享宜頒。朕底定荒陬。又安絕域。懷柔所及。龍
堆盡列于版圖。撫馭攸加。月窟咸通于聲教。叛會潰

竄頭屢觸于不周。勝旅先登。尸遂陳夫貳負。凡膚功之迅奏。實靈效之克彰。用奉明禋。永垂嘉典。峙金方而作鎮。著神功于華嶽以西。表翠障以爲屏。秩祀典於流沙之外。尙其出雲降雨。遠敷惠澤于邊疆。惟茲酌醴牽牲。敬念普存于帝力。神其來格。鑒此苾芬。

按是山在博克達鄂拉西八百里。和屯博克達鄂拉西一百里。博克達鄂拉尊如人首。額林哈畢爾噶。譯言硬肋。居元首之左右。天山最高峯爲博克達。則左右山皆可謂之額林

哈畢爾噶。今其方言。猶以此爲博克達左右山之通稱。茲據告祭所在。定爲哈屯博克達西百里之山。而推其名義如此。

庫舍圖達巴。

庫舍圖達巴。在額林哈畢爾噶鄂拉西南五十里。巴倫哈布齊垓郭勒。經其東麓。山脈自額林哈畢爾噶鄂拉分支南行五十里至此。又南少西五十里。爲們都招達巴。又南少西一百里爲鄂蘭達巴。又南少西五十里爲額勒伯克鄂拉。

皆傍東裕勒都斯郭勒之東。而繞於其南為天山正幹之分支。

都們招達巴。

都們招達巴。在庫舍圖達巴西南五十里。東裕

勒都斯郭勒東。嶺勢袤延。南北相屬。盡裕勒都

斯東境。

鄂蘭達巴。

鄂蘭達巴。在們都招達巴西南一百里。東裕勒

都斯郭勒南。自們都招達巴南行五十里。過東

裕勒都斯郭勒發源處。折而西五十里至其地。
額勒伯克鄂拉。

額勒伯克鄂拉。在鄂蘭達巴西南五十里。東裕

勒都斯郭勒南。自鄂蘭達巴西又南踰山口。為

裕勒都斯東西兩郭勒合流東注海都郭勒處。

烏爾圖布拉克出其南。

額布圖達巴。

額布圖達巴。在額林哈畢爾噶鄂拉西三百里

東裕勒都斯郭勒北。額布圖郭勒發源北麓。扎

噶蘇台。格納特。烏里雅蘇台。諸布拉克。出其南。山脈自伊犁南境之汗騰格里鄂拉東行五百里。爲納喇特達巴。又東北六十里。爲烏得音郭勒達巴。又東北五十里。至此東西橫亘。其東南一支。由額林哈畢爾噶鄂拉東行。爲迪化州南境之山。其西北一支。由哈喇古顏鄂拉西北行。爲伊犁北山。額布圖達巴。其分脈處也。烏得音郭勒達巴。

烏得音郭勒達巴。在額布圖達巴西南五十里。

東裕勒都斯郭勒。西空格斯郭勒。發源西麓。山脈自納喇特達巴。東行六十里。折而北。至此東谷口。通裕勒都斯。西谷口。通空格斯。東西谷口相距五十里。

納喇特達巴。

納喇特達巴。在烏得音郭勒達巴南六十里。空格斯南山脈。自汗騰格里鄂拉。由特克斯郭勒南。折而北。又南經西裕勒都斯郭勒北。蜿蜒東走五百里。至此又折而北。

汗騰格里鄂拉。

汗騰格里鄂拉。在納喇特達巴西五百里。特克斯郭勒發源北麓。東北距伊犁一百五十里。南距庫車三百里。山脈自西南四百里之木素爾鄂拉東行。分二支。其北一支。由圖斯庫勒東南折而東北。至特克斯郭勒源南。其南一支。自拜賽喇木。庫車之北。折而北行。逾西裕勒都斯郭勒發源處。折而西。與北一支合。汗騰格里當其交會處。山勢尊嚴。羣巒環拱。爲天山之主峯。

唐書西突厥傳。初曷薩那朝隋。被留不遣。乃共立達頭。號射匱可汗。建廷龜茲北之三彌山。玉門以西諸國。多役屬。與東突厥亢。

按龜茲爲今庫車。迤北諸山。汗騰格里爲大。應卽唐時三彌山。射匱可汗。當建廷山北也。額什克巴什鄂拉。

額什克巴什鄂拉。在汗騰格里鄂拉南二百里。山形寬廣。產硫黃。哈喇庫勒發源東南麓。赫色勒郭勒。東一源出西南麓。又東一源出南麓。是

山爲庫車北屏。距庫車城百里。山脈自木素爾
鄂拉分支東南行百餘里。爲阿勒坦呼蘇鄂拉。
至此北與汗騰格里鄂拉合。又東行一支接庫
克納克達巴。詳見天山南路。

魏書西域傳龜茲國西北大山中。有如膏者流
出成川。行數里入地如飴餹。甚臭。服之髮齒已
落者。能令更生。病人服之皆愈。

隋西域傳白山一名阿羯山。常有火及烟。卽是
出礪砂之處。

唐書西域傳伊邏羅城。北倚阿羯田山。亦曰白
山。常有火。

按今庫車。古龜茲地。伊邏羅城。唐龜茲國王
居之。則今庫車城北之額什克巴什鄂拉。應
卽唐書龜茲國北之阿羯田山。隋西域傳所
稱阿羯山也。史稱阿羯田山出礪砂。今額什
克巴什鄂拉產硫黃。考本草石硫黃。一名黃
礪砂。而字書無礪字。疑礪砂卽礪砂。若魏書
所云膏流如川。能令齒髮更生。愈病者。今不

可考矣。又考宋王延德高昌行記載北廷北山中亦出礪砂。有烟火。則隋所謂阿羯山者。又疑與今之迪化州為近。

阿勒坦呼蘇鄂拉。

阿勒坦呼蘇鄂拉。在額什克巴什鄂拉西一百餘里。赫色勒郭勒西一源。出其南麓。山脈自木素爾鄂拉。東南行百餘里。至此為賽喇木之北屏。

木素爾鄂拉。

木素爾鄂拉。舊音穆薩爾。在汗騰格里鄂拉西南四百里。圖斯庫勒南。拜城北。哈喇烏蘇哈布薩朗郭勒發源東南麓。木素爾郭勒兩源皆出其南麓。綽爾噶布拉克。都楚特郭勒。阿察哈喇郭勒。出其西。山脈自西三百里之薩瓦布齊鄂拉。東行至此。峯巒峻拔。冰雪嵯峨。艱於行旅。自鄂拉北。東北行通伊犁。乾隆二十五年秩於祀典。每歲春秋致祭。

歲祭木素爾鄂拉文。

惟神德符良止。位在兌維。秀甲羣峯。拔地倚天之勢。靈鍾絕徼。出雲降雨之功。匹葱嶺以稱尊。洵回中之巨鎮。臨于闐而作障。允塞外之隩區。朕紹服丕基。救寧方夏。渠搜卽敘。遂犁頡利之庭。蒲海載清。遠致防風之骨。踰二萬里而獻捷。不四五年而成功。維茲木素爾之山。實隣阿克蘇之域。曩者六師奏凱。式彰默佑之庥。今茲百部屯田。聿顯懷柔之應。是用登之祀典。載在秩宗。練吉日以薦馨。遣重臣而展告。廐縣肇舉。巍乎列嶽。鎮之班。胙蠻丕昭。歸然作塞垣之固。介

以繁祉。休有烈光。陳此苾芬。庶其歆格。

按古天山。統名雪山。卽今西陲諸部。氣候早寒。自鎮西府以西。高巖積雪。所在多有。而阿克蘇城東北木素爾鄂拉。勢尤聳峯。飛花攢玉。倍於他嶺。是以雪山雖天山之通稱。而茲嶺專有其名也。

薩瓦布齊鄂拉。

薩瓦布齊鄂拉。在木爾素鄂拉西南三百里。圖斯庫勒南。阿克蘇北。庫克墨爾根郭勒發源南

麓。山脈自喀克沙勒鄂拉。東北行二百三十里。爲伯得里克鄂拉。又東北二百四十里。爲卓哈達巴。又東二百里至此。岡嶺層沓。綿亘東北境。凡七百里。

唐書西域傳漢姑墨國西三百里度石磧。至凌山葱嶺北原也。水東流。冬夏山谷積雪。

按唐書西域傳稱自龜茲贏六百里。有跋祿迦。一曰亟墨。卽漢姑墨國。又三百里至凌山。是凌山在龜茲西九百里也。今薩瓦布齊鄂

拉。在庫車西北七百里。似所謂凌山。尙在其西。然考唐書又云。凌山西北五百里。至素葉水城。在今圖斯庫勒西。則唐之凌山。又當在今圖斯庫勒之南。與薩瓦布齊鄂拉之方位適合。更以東西七百餘里中大局考之。東爲木素爾郭勒。西爲托什干達里雅。皆出北山麓而東流。自木素爾鄂拉以西。嶺多雪難行。皆與唐書所謂水東流。春夏積雪者相合。是唐之凌山。卽不定爲薩瓦布齊鄂拉。亦必在

薩瓦布齊迤西一帶。自庫車西行九百里之間也。

卓哈達巴。

卓哈達巴。在薩瓦布齊鄂拉西南二百里。阿克蘇之西北。特木爾烏蘇郭勒出其東。

唐書地理志溫肅州西北三十里。至粟樓烽。又四十里度拔達嶺。

按今阿克蘇為古溫肅。卓哈達巴在其西北。應即溫肅州西北粟樓烽。拔達嶺之舊地。

伯得里克鄂拉。

伯得里克鄂拉。在卓哈達巴西南二百四十里。

烏成庫什達巴。

烏成庫什達巴。在伯得里克鄂拉西一百里。烏什之西。托什干達里雅出其東。

喀克沙勒鄂拉。

喀克沙勒鄂拉。在伯得里克鄂拉西南二百三十里。自額圖克達巴東北行至此。踰山而北通布魯特境。山南為喀什噶爾。南北相距各三百

餘里。

額圖克達巴。

額圖克達巴。在喀克沙勒鄂拉西南三百里。踰山而北。通布魯特境。山南爲喀什噶爾。山脈自葱嶺分支。由烏魯阿喇特達巴。東北行三百里至此。

哈喇鄂拉。

哈喇鄂拉。在額圖克達巴西北。爲其支山。博羅和什郭勒。木什諤斯騰。特們郭勒發源南麓。

按葱嶺分支。自額圖克達巴。東行歷木素爾鄂拉。又東歷汗騰格里鄂拉。又歷博克達鄂拉。又東入鎮西府境。極於塔勒納沁鄂拉。東西三千餘里。爲天山正幹。其南北諸山。皆從此分支。故別敘于天山南北路諸山之首。

欽定皇輿西域圖志卷之二十一

四 東 亞 細 亞 木 索 爾

